

四庫全書

集部

欽定四庫全書

集部

元詩選初集卷四十一

詳校官中書臣王鵬

主事銜臣徐以坤覆勘

總校官編修臣王燕緒

校對官檢討臣溫常綬

謄錄監生臣李煥霞

欽定四庫全書

元詩選初集卷四十一

庶吉士顧嗣立編

編修納新

納新字易之本葛邏祿氏驛言馬也世居金山之西元興西北諸部仕中朝者多散處內地故易之稱南陽人隨其兄宦遊江浙卜居于鄞再至京師以能文名尤長歌詩每一篇出士大夫輒傳誦之時浙人韓與玉能書王子充善古文

易之與二人偕來人目為江南三絕久之歸浙
東辟為東湖書院山長以薦授翰林編修官出
參僧格實哩軍事卒所著金臺集歐陽元功序
之謂其清新俊逸而有溫潤縝栗之容宣城貢
師泰稱其詞清潤纖華五言類謝朓柳惲江淹
七言類張籍王建劉禹錫而樂府尤流麗可喜
有謝康樂鮑明遠之遺風魏郡李好文曰易之
西北方人而粹然獨有中和之氣不喜祿仕惟

以詩文自娛其來京師特廣其聞見以助其詩
也其兄塔海仲良以進士起家而易之晚乃得
一官未竟其用虞文靖題其集云因君懷郭隗
千古意如何張丞旨起巖云愛君談辨似懸河
最喜交情古意多長使馬周貧作客令人千古
媿常何其所期望者深矣

登崆峒山

綠蘿陟層巘曠望浮雲馳飄風西北來颭颭吹裳衣氣

候候遷變中懷鬱歎歎路逢一道士高結冠巍巍恐是
廣成子載拜欲問之長歌入深林棄我忽若遺哀湍瀉
石磴日落松風悲靈一作雲蹤邈難及千載生遐思

賦環波亭送楊校勘歸豫章

季子

積水敞華構參差帶幽壑微風動輕蘋綠雲泛珠箔天
空夕陰斂川迴游鱗躍徘徊滄洲夢露下翠衾薄公子
屬鳴珮逍遙陟延閣微吟省樹移緩步庭花落放舟返
春渚言恣林泉樂揮觴靡可留悵望青山郭

三峰山歌

并序

鈞州陽翟縣南有山曰三峰昔我睿宗在邸嘗統兵
伐金與其三將完顏合達移剌蒲兀完顏斜烈等鏖
戰山下敗其軍三十萬而金亡矣今百餘年樵牧往
往于沙磧中得斷稍遺鏃印章之類至正五年嘉平
第二日子自鄰城將上京師道出陽翟夜宿中書郎
郭君彥通私館感父老之言而作歌曰

落日慘淡黃雲低懸崖古樹攢幽溪三峰山頭獨長嘯

立馬四顧風淒淒溝邊老翁行偃僂勸我停驂為君語
山前今日耕種場誰識當年戰爭苦金原昔在貞祐間
邊塵四起民彫殘燕京既失汴京破區區恃此為河山
大元太子神且武萬里長驅若風雨鏖兵大雪三將死
流血成河骨成堵朱鸞應瑞黃河清

金將亡新鄉河清鼓山鳳出應國朝

開基之兆

聖人啟運乾坤寧當時流離別鄉井歸來白髮歌

承平曠野天寒霜簌簌夜靜愁聞山鬼哭至今壟上牧
羊兒猶向草根尋斷鏃論功衛霍名先收黃金鑄印身

封侯英雄半死鋒鏑下何人酹酒澆荒丘

余比修國史睹三峰之役金師三十五萬來拒戰我師不敵軍于山之金溝其軍數重圍三峰而中夜大雪金人戈戟弓矢凍纏莫能施我師一鼓殲之自是金人膽落不復戰矣易之作歌辭豪健激昂而奕奕有思致殆與三峰長雄置之樂府競歌間揚厲無前之盛績良無媿也晉寧張翥題

京城燕

京城燕子三月盡方至
甫立秋即去有感而作

三月京城寒悄悄燕子初來怯清曉河隄柳弱冰未消

牆角杏花紅萼小主家簾幕重重垂銜芹却向檐

一作傍

間飛托巢未穩井桐

一作梧

墜翩翩又向天南歸君不見

舊時王謝多樓閣青鎖無塵卷珠箔海棠花外春雨晴
芙蓉葉上秋霜薄

題羅小川青山白雲圖為四明倪仲權賦

山上晴雲似白衣溪頭竹樹綠陰圍野橋日落行人倦
茅屋春深燕子飛灑酒屢招鄰舍飲放歌還趁釣船歸
客窻看畫空愁絕便欲移家入翠微

京城春日二首

三日諸郎僦直閒繞城騎馬借花看晚來金水河邊路

柳絮紛紛撲繡鞍

黃鶴樓東賣酒家
王孫清曉駐遊車
寶釵換得葡萄去
今日城東看杏花

送王季境還淮東幕

兩京驕馬越羅衣
公子風流世絕稀
冠蓋一門誇萬石
江山千古憶玄暉
新茶夜試中冷水
美酒春分采石磯
幕府羣公多勝賞
一枝芍藥待君歸

益清堂

并序

閩海憲使合魯桓穆公歸休嵩山之下鑿池引流列
植卉木扁其燕處之堂曰愛蓮公沒堂池逮廢其孫
國子生張閭伯高謙恭好學思繼先志乃復增葺而
新之國子先生陳伯敷易其名曰益清伯高謂余曰
與君世寓南陽且支裔聯屬不可無作因賦律詩十
有四韻以復其命云

嵩嶽雲峰近高居水竹幽築堂依別墅甃石帶芳溝翠
荇含風弱紅蕖著雨柔菱歌花外發蘭漿月中遊卷幔

紅雲亂開尊碧露浮使君曾弭節持斧照南州綠野池
臺暮平泉草樹秋吾宗多秀發公子獨清修屢接何蕃
武長懷賈誼憂拾螢供夜讀走馬散春愁朋友頻相過
琴觴每唱酬籍通青瑣貴文擅省闈優歸思勞清夢高
情憶故丘卜鄰端有約歲晚共綢繆

玄圃為上清周道士賦

玄圃雲深路渺茫神仙飛珮隔扶桑碧桃開盡春溪漲
白鶴歸來海月涼巖溜涓涓鳴石竇松花細細落琴牀

明年我亦山中去
賸采瑤芝滿藥囊

送王公子歸揚州

玉雪王公子
歸韉向竹西
水清淮白上
天閣海青低
瓊樹春前發
烏絲醉後題
何須問勲業
名與爾翁齊

題張萱美人織錦圖為慈谿蔡元起賦

織錦秦川窈窕娘
新翻花樣學宮坊
窗虛轉軸鶯聲滑
腕倦停梭粉汗香
雙鳳迴翔金縷細
五雲飛動綵絲長
明年夫壻封侯日
裁作宮袍遠寄將

春日次王元章韻

翠憶金車錦駱駝
芙蓉繡褥載雙娥
雨晴輦路塵沙少
風起春城柳絮多
秉燭且留清夜飲
倚闌猶聽隔牆歌
山翁此日心如夢
斷江南雨一蓑

桃花山水圖為桃源屠啟明題

天台山下雲無數
山南山北多桃樹
石洞春寒風雨深
落花半逐溪流去
人間從此識仙家
短櫂尋源到水涯
翠袖乘鸞下明月
玉盤留客進胡麻
我昔捫蘿探幽谷

青精煮飯松邊宿至今瞳子有神光細字猶能夜深讀
高人築屋石溪東溪山却與天台同粉黛含情記幽趣
碧桃流水春溶溶六月黃塵汗如洗獨騎瘦馬京城裏
忽見新圖雙眼明挈舟欲泛滄浪水我家只在蒼崖顛
白雲繞屋清溪連他日君能遠相覓看花酌酒春風前
送道士袁九霄歸金坡道院

朔風吹黃沙客子夢千里青山久不歸白日去如水昨
朝灤水上仙人偶來過自言遠紛塏結廬在金坡玉峽

樓層雲翠閣縈危棧鐘聲繞碧壇桃花出深澗雙童掃
白石展布彈瑤琴青松挂落月海色浮空林竟謝區中
緣騎龍忽歸去祇恐人民非那愁歲年莫君還鍊石髓
九轉成玄霜他時肯分贈碧落同翱翔

送葛子熙之湖廣校書二首

高槐疎雨作新涼猶記讎書白玉堂銀燭夜分供細字
宮壺曉賜出明光盤堆苜蓿青羶冷衣染檀花東帶長
宣室若蒙天子問定知賈誼在沅湘

南山木落氣蕭蕭千里歸心折大刀雙櫓鵝鳴秋水闊
三闖虎踞朔雲高客憲久念衣裘一作衾薄史館頻煩筆
札勞有約相逢明月夜扁舟載酒楚江皋

送太尉掾潘奉先之和林

御河冰消春欲莫官船繫著河邊樹河邊日日送行人
撾鼓開帆盡南去潘郎作掾獨未還腰弓却度居庸關
馬上長歌一回首闕南樹色青雲間七月金山已飛雪
牛羊散漫行人絕夜深陡覺羶帳寒酒醒只聞笳鼓咽

丈夫莫恨不封侯食肉須當萬里遊
腰間拂拭黃金印
他日相逢尚黑頭

賦甘露門送李御史之西臺

惟中

雉觀銀河近天清鼓角空
女牆秋色外仙掌月華中
雙闕當關樹高城繞漢宮
使君驄馬闕按轡立西風

送按攤不華萬戶湖廣赴鎮

三品新除萬戶侯
紅旗照海出皇州
腰間寶帶懸金虎
馬上春衫繡玉虬
水落張帆遊夢澤
月明撾鼓過南樓

書生最善從軍樂何日轅門借箸籌

雪霽晚歸偶成二首

公子腰弓下直歸紅門晚出馬如飛東街積雪無人埽
却恨春泥濺繡衣

東風悄悄著羅衫秉燭歸時酒半酣聽得隔簾人笑語
夜來春氣似江南

月湖竹枝詞四首題四明俞及之竹嶼卷

絲絲楊柳染鵝黃桃花亂開臨水傍隔岸誰家好樓閣

燕子一雙飛過牆

五月荷花紅滿湖團團荷葉綠雲扶女郎把釣水邊立
折得柳條穿白魚

水仙廟前秋水清芙蓉洲上新雨晴畫船撐著莫近岸
一夜唱歌看月明

梅花一樹大橋邊白髮老翁來繫船明朝捕魚愁雪落
半夜推篷起看天

送吳月舟之湖州教授

天涯作客少清歡
翦燭裁詩強自寬
江樹暮雲離思遠
杏花春雨客窗寒
烏程美酒臨池酌
罨畫青山拄笏看
博士從來官獨冷
團團朝日照空盤

賦鸚鵡送僕世南廉使之海南

朱崖擅珍鳥
鸚鵡獨專名
滿庭榕葉春
晝晴飛來却向
花間鳴
三月蠻江春水綠
日斜還傍江頭浴
弱羽翻風
溼翠流爪痕
蹴浪珊瑚束
間闌更作斷腸聲
水流花落
難為情
烏臺使君午夢醒
隔簾細雨春冥冥

江東魏元德所製齊峰墨于上都慈仁殿賜文錦

一作
縑馬漣以寵之既南歸作詩以贈云

錦襲玄圭瑩龍香秘閣浮漬毫春黛溼拂楮翠雲流繡
綺頌宮掖瓊漿出殿頭小臣沾雨露千載荷恩休

送楊復吉之遼陽學正

八月松亭萬木空著鞭又向黑河東穹廬宿頓供羊胛
部落晨炊爨馬通行看築臺招郭隗豈教執戟老揚雄
門生衣被多狐貉來聽談經絳帳中

徐伯敬哀詩

并序

伯敬姓徐氏諱仁則世為明之奉化大族早孤奉母
鞠弟至行有聞於時家貧益自勵嗜字學有能名王
公碩儒皆慕重之君與余同生年月日先於余為莫
逆者幾二十年歲庚辰君年三十有二得疾臥於家
余歸自京師聞之馳往省焉君伏枕已逾月既莫而
別君曰明日不復握手越宿訃至君果死矣嗚呼君
之孝弟溫慎益自治問學天假以年惡知其不少槩

見哉而卒以死如余之愚而求知之深又惡得不深
悲耶余再至京師徵銘于太史危先生以志其行實
於是復作詩以哀之詩曰

蕭蕭城南路白楊蔽江麓下有長夜臺陽景無由燭笳
鼓日夜悲往者不可復嗚呼徐徵君儀表冠梧竹十三
父早喪子子影獨我時已識君青燈照書屋十五學
篆籀鐘鼎飽撐腹鐫模布詞林論議動羣玉生計日蕭
條名聲愈清淑母也老而病伯兮苦盲目君能謹溫清

膝下供水菽鬻衣聚詩書呼弟對牀讀疊疊藥石言朋
類素欽服嗟余苦參商不得時相屬昨從燕山歸君已
臥帷得握手情既多翦韭薦醪醕出門不忍舍扶杖意
淒覺凌晨訃書來捐館已踰宿哀君多艱虞胡忍逝之
速日落且復升月虧望還足君往不復返使我淚盈掬
既無中饋嬪又乏南山栗何人為脫驂慰此倚門哭雲
浮白日陰慘慘風號木九原多黃壤宿草長新綠平生
布衣情裹雞醑寒淒

送朱景明從王廉使之山東

繡衣玉節鎮青沂佳士聯鑣出帝畿
天祿最憐劉向苦會稽深望買臣歸
御溝水落魴魚上官柳春迴燕子飛
鈴閣日長文字簡定將玉麈對君揮

秋日有懷徐仲裕二首

疊嶂青林雨氣昏側身南望幾銷魂
何時得似邗東叟日晏牽牛繫樹根

佛桑一樹隔

一作在

河西壓架蒲萄日影低記得長髯洪

處士醉眠木榻唱銅鞮

送劉將軍姑蘇之官

桃花駿馬綠羅襦意氣如雲出帝都暫解弓刀辭細柳
又懷印綬入姑蘇當筵翠杓春醅蟻列饌銀盤曉膾鱸
五月垂虹橋下路畫船吹笛臥冰壺

新月行

江南小兒不識愁新月指作白銀玉

一作玉

鈎家人見月更

歡喜卷簾喚我登高樓三年留滯京華裏滾滾黃塵馬

頭起一番見月一番愁歸心夜逐東流水在家不厭賤
與貧出門滿眼多故人誰念天涯遠遊客只有新月能
相親

宮詞八首次侯公遠正字韻

廣寒宮殿近瑤池千樹長楊綠影齊報道夜來新雨過
御溝春水已平隄

千官鵠立五雲間玉斧參差擁畫闌今日君王西內去
安排天仗趣儀鸞

水晶簾內日遲遲綺

一作殿

閣春深笑語稀繡幕無端風

卷起一雙燕子傍人飛

上苑含桃熟莫春金盤滿貯進楓宸醍醐漬透冰漿滑

分賜階前瀑直人

瓊島岩窵內苑西闌斑綺石甃清漪御牀不許紅塵到

黃幔長教窳地垂

花影頻移玉砌平美人欹枕聽流鶯一春多病慵梳洗

怕說鸞輿幸五京

繡牀倦倚怯深春
窗外飛花落錦茵
抱得琵琶階下立
試彈一曲鬪清新

太液池頭新月生
瑤階最喜晚來晴
貴人忽被西宮召
騎得驂騑款款行

送李中父典簿高麗頒歷

候儀太史立金鑾
寶歷新成錦作槃
天子垂衣朝萬國
中郎仗節使三韓
鮫人夜織機聲近
龍女晨遊珮影寒
獨捧絲綸渡遙海
遠人逾覺聖恩寬

送劉碧溪之遼陽國王府文學

松亭嶺上雪霏霏五月行人尚袂衣日暮草根黃鼠出
雨晴沙際白翎飛名王禮幣來青海弟子絃歌近絳幃
太乙終憐劉向苦高車駟馬遲君歸

三月十日得小兒安童書

辭家海上忽三年念汝令人思惘然萬里書來春欲莫
一庭花落夜無眠賈生空抱憂時策季子難求負郭田
但得南歸茅屋底儘將書冊教燈前

題舜江樓為葉敬常州判賦

峽嶠宮閣帶城皋雲霧軒窗擁六鼇隔岸雨來山氣合
五更風起角聲高春江把釣漁歌近秋日開筵客思豪
獨凭闌干望滄海百年難忘使君勞

葉君常于餘姚築石隄四十餘里以障海潮

送胥有儀南歸

立馬望華蓋君家碧嶂東樹圍茅屋外花落雨聲中卷
幔香雲入開編燭燼紅林梢新月上留客醉絲桐

次段吉甫助教春日懷江南韻

花底開尊待月圓羅衫半浥酒痕鮮一年湖上春如夢
二月江南水似天修楔每懷王逸少聽歌却憶李龜年
卜鄰擬住吳山下楊柳橋邊樣畫船

聞俠尚書除浙省參政因寄樂仲本

一春多病思紛紛隔屋幽禽夢裏聞夜雨來時愁作客
落花多處正思君尚書曳履登黃閣處士彈冠臥白雲
賓主東南高會日西湖風月定平分

秋夜有襄姪元童

八月絲

一作練

衣已怯涼伶俚絕似沈東陽薄帷風動流

螢入斷甃霜零

一作寒

促織忙病裏思家憐稚子燈前聽

雨憶江鄉墓田丙舍知何所一夜令人白髮長

送道士張宗嶽奉賀正旦表朝京竣事還龍虎山

大明初啟日蒼涼天子垂衣御萬方花織錦茵雙鳳翥

雲浮玉座九龍翔珠懸殿幄晨光動燈轉紗籠刻漏長

大明殿幄懸大寶珠于上
中設郭太史所製燈漏

銀漢星槎來萬里綠章雲篆

一作管

賀三陽舄趨青瑣煙霏繞酒出黃封雨露香芝草

繡衣金纂纂芙蓉紉佩玉瑤瑤重瞳屢顧眞希幸寵渥
頻承特異常辭陞更瞻天日表賜環應在水雲鄉留侯
印綬將歸璧時議後天師印綬使者旌旄已趣裝河朔游塵隨
騎氣江南清夢入詩囊仙源路近桃花發鬼谷山深榭
葉芳後夜相思京洛士黃精還許寄來嘗

京城雜言六首

神京極高峻風露恒泠然憧憧十二門車馬如雲煙紫
霞擁宮闕王氣浮山川我我龍虎臺日月開中天聖祖

肇洪業永保萬億年

世皇事開拓攬策羣霧清完顏據中原一鼓削蔡城趙
氏守南壤再鼓宗祚傾車書既混一田野安農耕嚮非
聖人出何能遂吾生

丘公神仙流學道青海東維時儒教師矯矯真天龍乾
坤始開廓魚水欣相從扣馬諫不殺嘉辭動天容保此

一言善元祚垂無窮

世祖常因金儒元好問之請為儒
教大宗師復納全真丘處機之一

言國家始終
好生不殺

居庸土高厚民物何雄強老稚閑弓獵不復知耕桑射
鵬陰山北飲馬長城旁駝羊足甘旨貂鼠克衣裳酒酣
拔劍舞四顧天茫茫

高槐拱朱垣樓閣倚空起劍佩何陸離車馬若流水昔
有社稷臣艱難闢荆枳歆血飲黑河剖券著青史國家
感勲勞報施及孫子

千金築高臺遠致天下士郭生去千載聞者尚興起我
亦慷慨人投筆棄田里平生十萬言抱之獻天子九闕

虎豹嚴撫卷發長喙

送慈上人歸雪竇追輓浙東完者都元帥二首

日本狂奴擾浙東將軍聞變氣如虹
沙頭列陣烽煙黑夜半鏖兵海水紅
膚栗按歌吹落月髑髏盛酒醉西風
何時盡伐南山竹細寫當年殺賊功

公常漆倭人
首為飲器

野狐嶺上雪紛紛馬鬣新封大將墳
千古交情見今日一時豪傑盡慙君
攜鉞滿貯灤河水飛錫還穿雪竇雲
歸坐山窻須有約半龕燈火夜論文

公薨于四明上人送
公柩至野狐嶺安葬

題中丞張文忠公希孟諫罷鐙山奏藁後序

至治間御史觀音保諫五華山事棄市公時為中書
參議翊日上諫鐙山疏大蒙嘉紀賜予甚厚云

纔聞御史戮中臺又見鐙山奏疏來自信茅焦無死罪
獨知蘇軾是英材九門爭看捐軀諫百辟驚傳拜賜回
千古救荒遺愛在祠門猶向曲江開

公因救荒陝西而
薨今賜廟于長安

新鄉媪

蓬頭赤脚新鄉媪青裘百結邨中老日間炊黍餉夫耕

夜紡棉花到天曉棉花織布供軍錢借人輓穀輸公田
縣裏公人要供給布衫剝去遭笞鞭兩兒不歸又三月
祇愁凍餓衣裳裂大兒運木起官府小兒擔土填河決
茅櫪雨雪燈半昏豪家索債頻敲門囊中無錢甕無粟
眼前只有扶牀孫明朝領孫入城賣可憐索價旁人怪
骨肉分離豈足論且圖償却門前債數來三日當大年
阿婆墳上無紙錢涼漿澆溼墳前草低頭痛哭聲連天
恨身不作三韓女車載金珠爭奪取銀鐺燒酒玉杯飲

絲竹高堂夜歌舞黃金絡臂珠滿頭翠雲繡出鴛鴦綢
醉呼閹奴解羅幔牀前爇火添香篝

右新鄉媼一首余同年瑤海仲良宣慰君之仲氏迺
賢易之所作也其詞質而婉豐而不浮其旨蓋將
歸於諷諫云爾昔唐白居易為樂府百餘篇以規諷
時政流聞禁中即日擢為翰林學士易之他詩若西
曹郎潁川老翁等篇其闢於政治視居易可以無媿
而藻繪之工殆過之矣況今天子聖明求言之誥播
在天下當此之時易之之詩或經乙夜之覽則其眷
遇又豈下於居易哉故余三復之餘謹識其後以俟
南臺中執法濮陽蓋苗
耘夫書於京師寓舍

巢湖述懷寄四明張子益

憶昔移家東海上萬斛龍驤跨鯨浪三神宮闕渺何許
弱水茫茫空悵望前年去作燕山遊羸驂短褐風颼颼
昭王臺前月似水荊卿驛畔天如秋病骨苦寒情苦倦
南下瀆河疾於箭清晨雙櫓發呂梁黃昏已泊桃源縣
生來每歎蜀道難去年我亦登蒼山馮公嶺頭日不到
肩輿履雪梯屨顏僕夫緣崖如凍蟻下頰鑕山深澗底
人家半出松樹頂白雲却向山腰起今年四月江西歸
小姑正對彭郎磯三更挂帆海門過一川草樹浮晴暉

我生胡為自役役
孟浪江湖竟何益
清霜鏡底縈鬢絲
坐對篝燈空歎息
愁來鬱鬱不可當
結交賴有張家郎
臨風同歌紫芝曲
埽石大醉黃金觴
我家南陽天萬里
十年不歸似江水
秋來忽作故鄉思
裹劍囊衣渡揚子
玩鞭亭下江縈紆
淮山楚樹青扶疎
一帆西風出巢縣
眼明墮此清冰壺
湖水漫漫接天杪
天低更覺青山小
倦飛沙鳥戛漁艇
倒影芙蓉涵碧藻
涼波不動舟如飛
櫂歌窅窅聲相隨
江東雲樹轉頭失
淮西山水尤清奇

故人江南不可見千里相思情眷戀門外梅花知未發
屋頭柿葉題應徧期君不來爭奈何青天落日搖滄波
明年歸來賀山下與君共讀巢湖歌

易之詩中所歷之
景予皆嘗過之所

未至者巢湖耳易之有此清雄俊拔之句予無
一語者人各有能有不能也太常博士危素書

梨花白頭翁圖為四明應成立題

澹月溶溶隔畫樓一枝香雪近簾鉤山禽似怨春歸早
獨立花間自白頭

汝水

天兵與宋合攻蔡州城既破金右丞完顏仲
德率將士六百人突圍遁至汝水回顧城中

煙焰漲天仲德下馬謂將士曰國已亡余居宗室
且備位宰相義固當死諸公宜早降諸將大譟曰
相公能死吾輩獨不能死耶
六百人皆奮然赴汝水以死

騎馬涉秋水泠泠戰骨聲寒沙沈斷戟殺氣暗殘營自
欲全忠義誰能顧死生千年董狐筆端不媿田橫

羅稚川山水十韻為角東應可立題

平生丘壑趣偶向畫中傳雨氣千峰外江流落日邊
蘼青滿渚芳樹綠參天渺渺溪雲淨涓涓石溜懸崖巔
何處閣谷口小家煙漁唱來秋浦僧鐘落夜船瞥驚飛

鳥過疑有蟄龍眠竹邇能留客桃源竟得仙丹青誇絕
代賦咏藉名賢千古滄洲意含情憶稚川

潁州老翁歌

潁州老翁病且羸蕭蕭短髮秋霜垂手扶枯筇行復却
探瓢勺食河之湄我哀其貧為顧問欲語哽咽吞聲悲

自言城東昔大戶腴田十頃桑陰圍闔門老稚三百指

衣食儘足常懸錐

一作熙熙

河南年來數亢旱赤地千里黃

塵飛麥禾槁死粟不熟長饑挂壁犁生衣黃堂太守足

宴寢鞭撲百姓窮膏脂聒天絲竹夜酣飲陽陽不問民
嗟飢市中斗粟償十千飢人煮蕨供晨炊木皮剝盡草
根死妻子相對愁雙眉鵠形累累口生皸鬻割餓莩無
完肌姦民乘隙作大盜腰弓跨馬紛驅馳嘯呼深林聚
兇惡狎弄劍槊搖旌旗去年三月入州治踞坐堂上如
熊羆長官邀迎吏再拜餽送牛酒羅階墀城中豪家盡
剽掠况在邨落人煙稀裂囊剖筐取金帛煮雞殺狗施
鞭笞今年災虐及陳潁疫毒四起民流離連邨比屋相

枕藉縱有藥石難扶治一家十口不三日藁東席卷埋
荒陂死生誰復顧骨肉性命喘息懸毫釐大孫十歲賣
五千小孫三歲投清漪至今平政橋下水髑髏白骨如
山崖繡衣使者肅風紀下車訪察民瘡痍綠章陳辭達
九陛徹樂減膳心憂危朝堂雜議會元老恤荒討賊勞
深機山東建節開大府便宜斬磔揚天威親軍四出賊
奔潰渠魁梟首乾坤夷拜官納粟循舊典戰士踴躍皆
歡怡淮南私廩久紅腐轉輸豈惜千金貲遣官巡行勤

撫慰賑粟給幣蘇民疲獲存衰朽見今日病骨尚爾難
撐持嚮非聖人念赤子填委溝壑應無疑老翁仰天淚
如雨我亦感激愁歔歔安得四海康且阜五風十雨斯
應期長官庶平縣令好生民擊壤歌清時願言觀風采
詩者慎勿廢我潁州老翁哀苦辭

狀物寫景之工固詩家之極致而繫於風化補於政
治尤作者之至言易之此詩兼得之矣禮部侍郎汝
陰李黼子威書易之此詩格調則宗韓吏部性情
則同元道州世必有能知之者監察御史太僕危素
書至正四年河南北大饑明年又疫民之死者過
半朝廷嘗議鬻爵以賑之江淮富人應命者甚衆凡

得鈔十餘萬定粟稱是會夏小稔賑事遂已然民罹
大困田萊盡荒蒿蓬没人狐兔之跡滿道時余為御
史行河之南請以富人所入錢粟貸民具牛種以耕
豐年則收其本不報覽易之之詩追憶往事為之惻
然八年三月翰林
待制武威余闕志

發大都

上京紀行

南陽有布衣杖策遊帝鄉憂時氣激烈撫事歌慨慷天
高多霜落歲晏單衣裳執手謝親友驅車出塞疆雲低
長城下木落古道旁憑高眺飛鴻離離盡南翔顧我遠
遊子沈思鬱中腸更涉桑乾河照影空彷徨

劉黃祠

唐劉黃幽州昌平人謫死柳州歷遼金無能發潛德至本朝天歷間昌平驛官宮祺

始奏建劉

諫議書院

入郭日已暝慘淡楓葉赤鞠躬荒祠下低迴想遺直劉
君素忠憤伏闕論邦國痛陳腹心禍竟罹考功斥餘子
盡騫騰鬱鬱負慚色鄉人仰高誼千載崇廟食悲歌風
蕭蕭感慨情惻惻出門無行人涼月照東壁

龍虎臺

大駕巡幸往返皆駐蹕臺上

晨登龍虎臺停驂望居庸絕壑閱雲氣長林振悲風翠

華有時幸北狩甘泉宮千官候鳴蹕萬騎如飛龍帳殿
駐山麓羽葆羅雲中我行避馳道弗得窮幽蹤衣裳倏
涼冷積霧浮空濛前山風雨來驅鞭復怱怱

居庸關

關北五里今敕建永明寶相寺宮殿甚壯麗有三塙跨于通衢車騎皆過其下

疊嶂緣青冥峭絕兩崖束盤盤龍虎踞岑巘互回伏重
闕設天險王氣輿坤軸皇靈廣覆被四海同軌躅至今
豪俠人危眺屢驚縮崎嶇棧閣峻縈紆岡澗曲環邨列
墟市鑿翠構廬屋溪春激巖溜山田雜稊菽絕頂得幽

勝人煙稍聯屬浮圖壓廣路臺殿出層麓白雲隱疎鐘
落日帶高木豈須歎蜀道政可夸函谷居人遠念我叩
馬苦留宿恐辜殷勤情解鞍看山瀑

榆林

出關喜平曠前林樹扶疎微茫候煙火參差見屋廬美
人秋水上娟娟映芙蓉蒼隘車騎塞山寒日將晡行人
問旅舍投鞭息馳驅張燈秣駑馬斷檣餘青芻夜涼衾
稠薄悒悒愁前途雞鳴山窻曙去矣毋躊躇

槍竿嶺

山腰長城遺跡尚存

飲馬長城下水寒風蕭蕭遊子在絕漠仰望浮雲飄前
登槍竿嶺岡岑鬱嶢峽崩崖斷車轍層梯入雲霄幽龕
構絕壁微徑紆山腰一作板人行在木末日落聞鳴蜩履
險力疲茶憑高思飄飄何當脫羈鞅歸種南山苗

李老谷

谷中多杜鵑

高秋遠行邁入谷雲氣暝稍稍微雨來漸怯衣裳冷縈
紆青崦窄杳篠煙林迴峰迴稍開豁夕陽散微影霜葉

落秋澗寒花媚秋嶺途窮見土屋人煙雜墟井平生愛
山癖悵此愜幽靜月落聞子規懷歸心耿耿

赤城

金閭山在赤城西郊洞明真人修鍊之所山中盛產青李來禽諸果

休駕赤城館憑軒望前山飛雨西北來亂灑石壁間風
寒樹撼撼水落沙班班牛羊盡歸柵微燈掩松闌野老
頗留客及此農事閒頃筐出山果濁酒聊慰顏移尊對
金閣靈宮鬱孱頑安得吹簫人乘鸞月中還

龍門

元統間知樞密院事都刺帖木兒過峽中見二羊闕山椒樹間頃刻大雨水溢姬妾輜重皆為漂溺

崢嶸龍門峽曠古稱險絕疏鑿非禹功開闢自天設聯
岡疑路斷峭壁忽中裂雲蒸雨氣暝石觸水聲咽羸驂
涉溝澗執轡屢愁一作隘蹶憶昔兩羝羊忿鬪蛟龍穴暴
雨忽傾注淫潦怒奔決人馬多漂流車軸盡摧折我行
愁陰霾慘慘情不悅日落樵唱來三歎腸內熱

獨石

國朝諸后太子陵皆
在獨石北羶帽山

停驂眺青林獨石當廣路我我龍君祠殿屋隱朝霧前
山過微雨暝色起高樹溪灣夕溜清巖竇寒雲聚東園

有陵寢龍虎蔚盤據行人下馬過斂衽夙驚思涼風吹
華髮感激歲年莫悵望南天雲徘徊不能去

檐子窪

昔多盜賊今置巡檢司于
山椒其山無林木皆蔓草

朝發牛羣頭夕憩檐子窪高秋得清曠野蔓多幽花黃
雲翳日脚草色浮天涯山荒樹寂寞寒陂落昏鴉頗喜
盜賊清塞田盡禾麻至今將軍壘日落聞清笳我生久
羈旅崎嶇涉風沙天寒道路遠曛黑投山家

李陵臺

落日關塞黑蒼茫路多岐荒煙淡暮色高臺獨巍巍
嗚呼李將軍力戰陷敵圍豈不念鄉國奮身或來歸漢家
少恩信竟使臣節虧所媿在一死永為來者悲千載撫
遺跡憑高起遐思褰裳覽八極茫茫白雲飛

次上都崇真宮呈同遊諸君子

鷄鳴涉灤水慘淡望沙漠宮廬在中野草際大星落風

高班馬

一作馬驚

嘶露下貂裘薄晨霞發海嶠旭日照城郭

嵯峨五色雲下覆丹鳳閣琳宮多良彥休駕得棲泊清

尊置美酒展席共歡酌彈琴發幽懷擊筑咏新作主時
屬承平幸此帝鄉樂願言崇令德相期保天爵

實喇鄂爾多觀詐馬宴奉次貢泰甫授經先生韻

五首

詔下天門御墨題龍岡開宴百官齊路通禁籞聯文石
幔隔香塵鎮水犀象輦時從黃道出龍駒牽向赤墀嘶
繡衣珠帽佳公子千騎揚鑣過柳隄

珊瑚小帶佩豪曹壓轡鈴鐺雉尾高宮女侍筵歌芍藥

內官當殿出蒲萄
栢梁競喜詩先捷
羽獵爭傳賦最豪
一曲霓裳纔舞罷
天香浮動翠雲袍

繡綺新裁雲母帳
玉鉤齊上水晶簾
鳳笙屢聽伶官奏
馬湏頻煩太僕添
風動香煙飄合殿
日扶花影上雕檐
金盤禁臠纔供膳
階下傳呼索井鹽

上林宮闕淨朝暉
宿雨清塵暑氣微
玉斧照廊紅日近
霓旌夾仗彩霞飛
錦翎山雉攢遊騎
金翅雲鵬織賜衣
宴罷天階呼秉燭
千官爭送翠華歸

灤河源似九龍池
清暑年年六月時
孔雀御屏金纂纂
樓閣別殿日熙熙
青藜獨喜頌劉向
黃閣重開拜子儀

千載風雲新際會
願將金石播聲詩

時太傅脫公再入相

雨夜同天台道士鄭蒙泉話舊并懷劉子彝

蒙泉時奉

祠上京崇真宮子彝常于四明東湖築天壇道院以待蒙泉東歸

履雪台州老鄭虔
相逢灤水話當年
草堂聽雨秋將半
石鼎聯詩夜不眠
遙憶東湖來夢裏
起看北斗落窻前
劉郎獨愛長生訣
日日天壇望鶴還

行路難

至正己丑夏右相朶兒只公拜國王就國遼東是日左相賀公亦左遷因感而作

行路難難行路黃榆蕭蕭白楊莫槍竿嶺上積雪高龍
門峽裏秋濤怒嗟我虎豹當大關蒼崖壁立登天難千
車朝從赤日發萬馬夜向西風還鑑湖酒船苦不蚤遼
東白鶴歸華表夜雨空階碧草深落花滿院行人少世
情翻覆如秋雲誓天歎血徒紛紛洛陽爭迎蘇季子淮
陰誰識韓將軍行路難難行路白頭總被功名誤高樓
昨夜歌舞人丹旌曉出東門去子午谷終南山青松草

屋相對閒拂衣高歌上絕頂請看人間行路難

塞上曲五首

秋高沙磧地椒稀貂帽狐裘晚出圍射得白狼懸馬上
吹笳夜半月中歸

雜沓羶車百輛多五更衝雪渡灤河當轅老嫗行程慣
倚岸敲冰飲橐駝

雙鬟小女玉娟娟自卷羶簾出帳前忽見一枝長十八

折來簪在帽簷邊

長十八
草花名

馬乳新桐玉滿餅沙羊黃鼠割來腥蹋歌盡醉營盤晚
鞭鼓聲中按海青

烏桓城下雨初晴紫菊金蓮漫地生最愛多情白翎雀
一雙飛近馬邊鳴

歸途至金閣山懷虞侍講

羸驂八月過雲州殿閣嵯峨疊嶂稠空谷無人黃葉落
白雲如雪滿溪流獨登金閣尋山跡還憶青城覓舊遊
日落長歌下山去西風十里異香浮

虞公過山下常
聞異香十餘里

還京道中

客遊倦縑塵夢寐想山水停驂眺遠岑悠然心自喜晨
霞發暝林夕溜洄清沚出峽涼風馳入谷塞雲起霜清
卉木疎日落峰巒紫迢遞越關河參差望宮雉家童指
歸路居人念遊子各嗟行路難深乖攝生理終期返南
山高揖謝城市

海上幽人錦繡腸獨臨灤水惜年芳千金不賣長門
賦閒寫新詩寄玉堂臨川危素敬題 憶陪仙仗度
闕時玉帳星聯紫翠圍今日讀君天上
曲依然環珮月中歸括蒼胡深敬題

贈張直言南歸

天子開明堂股肱任夔高四方多章奏俯伏陳陞闕臣
聞黃河流洶洶怒衝鬻鉅野及青徐千金盡魚鼈載憂
山東盜馮陵據巢穴腰弓入城市白晝肆攘奪嶺南失
控御猛獷恣猖獗運饟山溪阻野戰瘴雲熱爨焚寇雲

南兵禍久聯結誰憐鄜生辨竟墮韓侯謫

參政木律存
道事與鄜食

其邊將多貪殘駝羊盡膏血南兵久孱懦海上縱狂孽

租庸弊吳楚鹺征困閩浙文牘日冗繁民力愈疲竭詔

下閭闔門求言補遺缺張君素忠憤意氣古豪傑裹糧涉江淮徒步犯霜雪伏謁中書堂揚眉吐奇說愚策十有六歷歷甚詳切倘蒙錄一二亦足解鉗掣鯁生非狂謬閣下幸裁決丞相屬春官分曹校優劣翩然不俟報長揖與子別言歸南山廬白雲可怡悅長溪釣魴鱖春山採薇蕨飯疏飲清泉終焉養高潔賤子託深誼持觴候車轍既攄平生蘊尚復鑒前哲劉蕡竟下第賈誼空嗚咽讀君囊中書捫君口中舌歌君白馬篇贈君蒼玉

玳相期爛柯山笑濯澄潭月

南城咏古十六首

并序

至正十一年八月既望太史宇文公太常危公偕燕
人梁處士九思臨川黃君殷士四明道士王虛齋新
進士朱夢炎與余凡七人聯轡出遊燕城覽故宮之
遺跡凡其城中塢廟樓觀臺榭園亭莫不徘徊瞻眺
拭其殘碑斷柱為之一讀指廢興而論之余七人者
以為人生出處聚散不可常也解后一日之樂有足

惜者豈獨感慨陳迹而已哉各賦詩十有六首以紀其事庶來者有所徵焉河朔外史迺賢序

黃金臺

大悲閣東南
隗臺坊內

落日燕城下高臺草樹秋千金何足惜一士固難求
滄海誰青眼空山盡白頭還憐易河水今古只東流

憫忠閣

唐太宗憫征遼
士卒陣亡而建

高閣秋天迴金仙寶珞齊青山排闥見紫氣隔城迷
朱拱浮雲溼凋檐落照低因懷百戰士惆悵立層梯

壽安殿

殿基今為酒家壽安樓

夢斷朝元閣來尋賣酒樓
野花迷輦路落葉滿宮溝
風雨青城莫河山紫塞愁
老人頭雪白扶杖話幽州

聖安寺

寺有金世宗章宗二廟篆

蘭若城幽處聯鑣八月來
寶華幢蓋合袞冕畫圖開
斷碣蒼苔暗空庭落葉堆
饑鶯不避客攫食下生臺

大悲閣

閣勝虞世南書

閣道連天起丹青飾井幹
如何千手眼只著一衣冠
金

榜交龍挾瑯覺吻獸攢憑高天萬里白紵不勝寒

鐵牛廟

燕人重東作銘鐵象牛形角斷苔花碧蹠穿土鋪腥遺
蹤傳野老古廟託山靈一酌壺中酒穰穰黍麥青

雲仙臺

今之望月臺

臺殿青冥外團團海月涼隔簾聞鳳管秉燭奏一作按霓

裳銅雀晨霞眩金盤夕露灑仙人不復返愁殺海生桑

長春宮

全真丘神仙處幾之居太祖常召至西域之雪山誦道屢勸上以不殺

羸驂蹋秋日

一作水

迢遞謁琳宮松子花飄落溪流板閣

通樓臺非下土環珮憶高風草昧艱難日神仙第一功

竹林寺

金熙宗駙馬宮也
寺僧云一塢無影

城南天尺五祇樹給孤園甲第王侯去精藍帝釋尊老
僧誇塢影稚子斲松根何日天台路相從一問源

龍頭觀

龍頭懸三牙籤
刻曰建隆元年

仙館紅塵外龍頭得借看開函雲氣溼近席雨聲寒碧
血凝螺黛香涎逼麝檀牙籤認題字猶是建隆刊

粧臺

李妃所築今在昭明觀後妃常與章宗露坐上曰二人臺上坐妃應聲曰一月日邊明上大悅

廢苑鶯花盡荒臺燕麥生韶華如逝水粉黛憶傾城野菊金鈿小秋潭石鏡清誰憐舊時月曾向日邊明

雙塢

安祿山史思明所建在憫忠寺前

安史開元日千金構塢基世尊寧安福天道自無私寶鐸游絲罥銅輪碧蘚滋停驂指遺跡含憤立多時

西華潭

金之太液池

秋水清無底涼風起綠波錦帆非昨夢玉樹憶清歌帝

子吹笙絕漁郎把釣多磯頭浣紗女猶恐是宮娥

白馬廟

祠宇當城角霜蹠刻畫眞房星何日墜駿骨自能神曾
蹴陰山雪思清瀚海塵長疑化龍去騰蹋上雲津

萬壽寺

寺有許道
寧畫屏

皇唐開寶構歷劫抵金時絕妙青松障清涼白玉池長
廊秋櫺響高閣夜鐘遲獨有乘門客扶藜讀舊碑

玉虛宮

大道教以供薪水之勞為其張
本宮主張真人其貌甚清古

樓觀迴深巷松枝夾路低拾薪供早爨抱甕灌春畦經
向琅函讀詩從古鼎題白蘋張道士送客過桃溪

古鏡篇寄韓與玉

時與玉將南歸
故賦此留別

古鏡團團似秋水美人當窻正梳洗芙蓉涼月鬪嬋娟
默默自憐還自喜朝來開匣忽淒然一痕微雪映華鈿
却恨東風惜桃李年年開傍鏡臺邊粉絲拭鏡還清澈
佳人薄命空愁絕不如化石在山頭萬古千年照明月

病起書事呈兼善尚書

閭閻積雨浸城皋四望平疇白浪高太息人材無董賈
可憐經濟屬蕭曹山東壁馬祠河伯海上旌旗擁賊壕
變理自知廊廟貴腐儒憂國漫心勞

尚書時奉白馬玉
壁祭決河回復命

議平
海寇

孔林瑞槐歌

并序

先聖墓林古槐一章枝幹偃蹇膚理若鐫刻篆籀龍
鳳細如絲髮雖善畫者莫能狀其奇巧襲封衍聖公
愈加培植見者咸加敬愛因以紀瑞云

闕里陰陰槐樹古百尺長柯挾風雨密葉蟠空擁翠雲
深根貫石流瓊乳蒼皮皴蝕紋異常天成篆籀分毫芒
游絲紫錯科斗亂雲氣飛動龍鸞翔羸秦書焚土坑僂
幾歎遺經藏壁屋千年聖道復昭明喜見文章出嘉木
神明元冑嗣上公雨露滋沐深培封清陰如水石壇靜
彈琴樹底歌薰風

秋夜有懷明州張子淵

雲表銅盤挹露華高城涼冷咽清笳弓刀夜月三千騎

燈火秋風十萬家夢斷佳人彈錦瑟酒醒童子汲冰花
起看歸路銀河近願借張騫八月槎

題王虛齋所藏鎮南王墨竹

帝子乘鸞謁紫清滿天風露翠衣輕閒將十二參差玉
吹向雲間作鳳鳴

投贈趙祭酒二十韻

字子期
宛丘人

三朝元老國蒼龜山立精神虎豹姿高步瓊林開宦轍
早登華省被恩私棟梁材器明堂用臺閣文章聖主知

輦下懇辭郎署久斗南爭望使星移諫垣屢賞朱雲節
宣室重陳賈誼辭錦綬還鄉迎駟馬繡衣行部去檐帷
談經祕閣重裊坐扈蹕甘泉載橐隨玉節引班朝謁早
金蓮擁騎夜歸遲尚書曳履登鸞閣給事含香近鳳池
冰檠操持心似鐵廟廊贊畫鬢成絲久聞陸贄頻憂國
盡許匡衡喜說詩百世斯文開絕學四門胄子得名師
絃歌濟濟承周禮冠佩蹒蹒舉漢儀掌故傳經編竹簡
諸生脫穎擅囊錐鄙人自致慚無術男子平生漫負奇

久望車塵空感激欲趨門屏媿驅馳王陽豈待彈冠慶
孺子還應下榻思輒效詩人陳賦頌敢從閭吏候旌麾
何蕃獨重陽司業嚴武深憐杜拾遺懷寶山林當一出
平津正在禮賢時

荅祿將軍射虎行

并序

荅祿將軍世為乃蠻部主歸國朝拜隨穎萬戶平金
有功事載國史其出守信陽射虎之事尤偉曾孫與
權舉進士為祕書郎官與余雅善間言其事因徵作

歌

將軍部曲瀚海東三千鐵騎精且雄久知天命屬真主
奮身來建非常功世祖神謨涵宇宙坐使英雄皆入彀
十年轉戰淮蔡平帳下論功封太守信陽郭外山嵯峩
長林大谷青松多白額於菟踞當道城邊日落無人過
將軍聞之毛髮豎拔劍誓天期殺虎彎弓走馬出東門
傾城來看誇豪武猛虎磨牙當路嗥目光睒睒斑尾搖
據鞍一叱雙背裂鳥飛木落風蕭蕭金弰琯弓鐵絲箭

滿月弦開正當面鵬翎射沒錦毛摧厓石崩騰腥血濺

萬人歡笑

一作誰譟

聲震天刮開一箭

一作鏃

當心穿父老持

杯馬前拜祝公眉壽三千年將軍

一作丈夫

立功期不朽奇

事相傳在人口可憐李廣不封侯却喜將軍今有後承

平公子祕書郎文場百步曾穿楊咫尺風雲看豹變鳴

珂曳履登朝堂

虎既剖箭鏃正貫于心中

京城春日二首

官牕冰消綠漫隄落花流水五門西黃鸝不管春深淺

飛入南城樹上嘯

新樣雙鬟束御羅
疊騎騎馬粉牆過
迴頭笑指銀餅內
官酒誰家索較多

新隄謠

并序

近歲河決白茅東北汜濫千餘里始建行都水監于
鄆城以專治之少監蒲從善築隄建祠病民可念予
聞而哀之乃為作歌

黃河決道時有清水先流至名曰漸水曹濮之人見此水皆遷

居高立
預避

老人家住黃河邊黃茅縛屋三四椽有牛一具田一頃
藝麻種穀終殘年年來河流失故道墊溺邨墟決城堡
人家墳墓無處尋千里放船行樹杪朝廷憂民恐為魚
詔蠲徭役除田租大臣雜議拜都水設官開府臨青徐
分監來時當十月河冰塞川天雨雪調夫十萬築新隄
手足血流肌肉裂監官號令如雷風天寒日短難為功
南邨家家賣兒女要與河伯營祠宮陌上逢人相向哭
漸水漫漫及曹濮流離凍餓何足論只恐新隄要重築

昨朝移家上高丘水來不到丘上頭但願皇天念赤子
河清海晏三千秋

劉舍人桃花馬歌

青絲駿馬桃花色翠鞍玉轡黃金勒奚奴牽出不敢騎
道上行人爭愛惜往時曾遇李將軍汗流赤血氣如雲
朝刷黃河莫南粵沙場百戰成奇勲歸來無心伏槽櫪
頓轡長鳴思奮力東家白面繡衣郎千金買去遊南陌
昨朝校獵向城隅萬人爭說天下無夜歸不怕霸陵尉

玉鞭醉打蒼頭奴。畫燭銀屏歡徹曙。一朝金盡賓朋去。
可憐驕馬屬誰家。斷繮猶繫階前樹。君不見西家款段
三十年。青芻滿櫪菽滿田。老翁不識城下路。騎看射獵
南山邊。

贈沈元方歸吳興兼簡韓與玉

春城飛絮曉紛紛。金水河邊更送君。關下馬卿憐作客。
江南沈約最能文。天園斷岸歸帆遠。水落黃河野樹分。
寄謝平生韓處士。別來應是賦停雲。

送林庭立歸四明兼簡張子端兄弟

徵君歸隱海東頭三月開帆江水流
坐看浮雲知世態

長歌落日送離愁平生不負楊臨賀
此去端如馬少游

若見山中陶宰相白雲千里思悠悠
庭立客賀相府相左遷獨遠送之其

鄉多弘景故蹟

次韻趙祭酒城東宴集四首

子斯

金河流水碧粼粼御柳煙銷曙色新
黃鳥只愁春去遠

隔窻呼醒看花人

童子將車候辟雍先生載酒出城東
絲絲細雨春雲薄
却恨羅衫怯曉風

上東門外杏花開千樹紅
雲繞石臺最怪奎章虞閣老
白頭騎馬看花來

十騎聯鑣入郭遲從教斜日過棠梨
候門稚子牽衣笑
今日先生有好詩

國子監散學候日
影到堂後梨樹

贈謝尚禮歸盱江

畫船綠樹映滄波
撾鼓開船發御河
作惡情懷唯仗酒

落花時節況聞歌潮來別浦江聲急雲起南山雨氣多
落日都門一分袂相思千里奈君何

北邙山歌

白樂天賜第履道坊既葬北邙敕命遊人
至墳所者必酌酒至今墓前隙地泥潦

北邙山高雲嵯峨山前日日聞輓歌千金買穴望卿相
不道洛陽人葬多長安歸來錦衣客昨日城南起新宅
雕闌華礎滿前楹盡是當年墓邊石墓邊野老鬢如絲
自言曾見築墳時轉頭石馬臥荊棘白楊蕭瑟秋風悲
白日西流水東逝眼見君家葬三世舊時隧道盡為田

新墳苦作千年計寄語洛陽諸少年對酒莫惜黃金錢
縱有穹碑勒勲業文章誇靡誰能傳君不見履道坊中
白太傅留客高堂醉歌舞至今三月看花人載酒去澆
墳上土

讀金太祖武元皇帝平遼碑

在南城豐宜門外金史臣韓防撰字文虛中書

千丈豐碑勢倚空風雲猶憶下遼東百年功業秦皇帝
一代文章太史公石斷龍鱗秋雨後苔封鼉背夕陽中
行人立馬空惆悵禾黍離離滿故宮

讀汪水雲詩集二首

并序

水雲汪元量字大有錢塘人以善琴受知宋主國亡
奉三宮留燕甚久世祖皇帝嘗命奏琴因賜為黃冠
師南歸時幼主瀛國公福王平原郡公趙與芮駙馬
右丞楊鎮故相吳堅留夢炎參政家鉉翁文及翁提
刑陳杰貴陽夢炎與宮人王昭儀清惠以下廿有九
人分韻賦詩以餞其行水雲之詩多記其國亡時事
與文丞相獄中倡和之作文丞相又與馬丞相廷鸞

章丞相鑑鄧禮部光薦謝國史枋得劉太博辰翁序
其詩集劉公又為批點余間聞危太史言曰水雲長
身玉立修髯廣額而音若洪鐘比歸數往來匡廬彭
蠡之間若飄風行雲世莫能測其去留之跡江右之
人以為神仙多畫其像以祠之像至今有存者其諸
公所賦墨蹟嘗見于臨川僧舍云及余至京師因徐
君敏道得水雲集讀而哀之偶成二律以識其後
三日錢塘海不波子嬰繫組納山河兵臨魯國猶絃誦

客過殷墟獨敲歌鐵馬渡江功赫奕銅人辭漢淚滂沱

知章喜得黃冠服

一作賜

野水

一作服

閒雲一釣蓑

一曲絲桐奏未休蕭蕭笳鼓禁宮秋湖山有意風雲變
江水無情日夜流供奉自歌南渡曲拾遺能賦北征愁
仙人一去無消息滄海桑田空白頭

七月十六夜海上看月二首

樓船留客宴良宵坐看冰輪出海潮却憶去年灤水上

夜深孤館雪蕭蕭

去年客上都
是日大雪

征人七月度榆關
貂鼠裁衣尚怯寒
不信江南今夜月
有人揮扇著冰紈

陵州

日落陵州路沿流古岸傍
泊舟人自語聽雨夜偏長
過客愁聞盜荒邨久絕糧
何人肯憂國得似董賢良

董仲舒
陵州人

寶林八咏為別峰同禪師賦

飛來峰

千仞瑯琊石飛來鎮越州
江波欲浮動還被白雲留

應天塢

獨上峰顛塢秋清曙色開憑闌望東北潮向海門來

大布衣

大布僧伽納流傳六百年攜來香滿裏猶是御爐煙

鐵鉢盂

鐵鉢溪頭洗冰花六月寒山僧偶彈舌引得老龍蟠

羅漢泉

錫杖虛空落靈泉發地中忽看流菜葉始信石橋通

霸鰻井

甃石瀦山溜蜿蜒竹色青
風來忽涼冷雨氣隔林腥

深竹堂

一笏清涼地森森萬玉齊
月明待倚杖閒看鳳來棲

盤翠軒

石磴藤花落山窻嵐氣浮
晚來高樹暝一榻似新秋

田家留客圖為四明劉師向先生賦

客來田家當六月主人相留樹邊歇
呼兒牽馬飲清泉

廚裏新漿解君熱郎君出城幾日前城中米價今幾錢
昨夜南邨三尺雨不知還到城濠邊勿厭儂家茆屋小
棘門新編土牆繞明朝蚤飯莫怱怱雞鳴送君出官道
送楊季子赴德慶知事

天祿揚雄久較書忽聞章綬綰銀魚一官遠赴諸侯幕
六轡先乘使者車椰子剖漿霜落後荔枝封蜜雨晴初
故人只守平生業一硯相求不願餘

馬德良下第

三月都門鶯亂飛東風客館思依依樂生空受昭王聘
蘇子深慚李鷹歸白璧人間須待價青藜天上更分輝
瓊林花發重來日五色春雲照錦衣

羽林行

羽林將軍年十五盤螭玉帶懸金虎黃鷹白犬朝出遊
翠管銀箏夜歌舞珠衣繡帽花滿身鳴騶斧鉞驚路人
東園擊球誇意氣西街走馬揚飛塵湖南昨夜羽書急
詔趣將軍遠迎敵寶刀鏽澀金甲寒上馬彷徨苦無力

美人牽衣哭向天將軍執別淚如泉安得天河洗兵甲
坐令瀚海無塵煙君不見關西老將多戰謀數奇白髮
不封侯據鞍矍鑠尚可用誰憐射虎南山頭

賣鹽婦

賣鹽婦百結青裙走風雨雨花灑鹽鹽作鹵背負空筐
淚如縷三日破鑊無粟煮老姑饑寒更愁苦道傍行人
因問之拭淚吞聲為君語妾身家本住山東夫家名在
兵籍中荷戈崎嶇戍吳越妾亦萬里來相從年來海上

風塵起樓船百萬秋濤裏良人賈勇身先死白骨誰知
填海水前年大兒征饒州饒州未復軍尚留去年小兒
攻高郵可憐血作淮河流中原封裝音信絕官倉不開
口糧缺空營木落煙火稀夜雨殘燈泣嗚咽東鄰西舍
夫不歸今年嫁作商人妻繡羅裁衣春日低落花飛絮
愁深閨妾心如水甘貧賤辛苦賣鹽終不怨得錢糴米
供老姑泉下無慚見夫面君不見繡衣使者浙河東采
詩正欲觀民風莫棄吾儂賣鹽婦歸朝先奏明光宮

仙居縣杜氏二真廟詩

并序

東陽杜氏二女子蚤喪父母鬻餅市中廚人挑之二
女子憤殺廚人走匿仙居之孟溪夜雨水漲皆溺水
其屍閣巨木上蒼藤纏束儼若棺槨時隋大業間也
唐令令狐闕取其遺骨塑像建廟溪上宋令古零陳
襄禱雨屢應刻石祠下國朝至正壬寅東陽陳君元
祥以浙省員外督制茲邑水旱之禱顯有奇徵明年
君督漕入京請諸中書命太常議封貞惠貞淑二真

仙元祥因徵賦詩廟壁云

君不見瀟湘江上斑斑竹雨灑疎林淚痕綠又不見金谿縣裏兩嬋娟身化白金金漸復至今九疑山下大江
西窈窕祠堂依古木仙居更有杜貞娥千古清風凜相
續貞娥鬻餅東陽市廚人相挑憤投齒捉刀夜斷賊奴
頭勇烈真同丈夫子脫身竄匿來孟溪木食澗飲幽巖
栖梵梵姊妹自相保天寒愁聽哀猿嘯夜雨奔流溢山
趾月黑溪深黯無底嗚呼雙娥同溺死玉骨藤纏高樹

裏開元賢令銜餘哀築祠却傍蒼崖開悲風蕭蕭落山
葉精霽日莫猶歸來陳侯自是古零後來作仙居民父
母銜香赤脚禱龍湫秋日甘霖起枯朽去年飛章徹九
閭紫綾裁誥褒貞魂鸞車孔蓋蔽白日仿佛來謝朝家
恩男兒堂堂軀七尺忍詬含羞汙簡冊何如貞惠貞淑
兩真仙萬古千秋長廟食

使歸

白頭萬里喜來歸小院深深過客稀睡起無題開錦橐

春來多病怯羅衣
流鶯亂蹴殘紅溜
乳燕連穿散絮飛
莫道山房渾寂莫
臥聽小女學鳴機

題吳照磨墨梅

天台吳架閣京下憶尋梅
倚杖月中立思君江上來
夜深憐雪落香動覺春迴
獨坐溪邊石晴雲滿綠苔

予有山水圖留倪仲愷大師齋中久未得題品
一日危太樸應奉謂余曰昔人皆以酒解醒子能作
歌求詩亦此意也遂成古詩一章以趣之

野人築屋青山底綠篠娟娟蔭秋水天涯作客想江南
乞君題詩畫圖裏畫圖疊嶂雲鈎連汀花岸草春依然對此
令人動歸興却思把釣清溪邊一束殘書挂牛角大笑
青天看日落窗下孤燈夜雨深人間萬事秋雲薄明年
我亦去山陰君歸泛雪須相尋草堂下榻看圖畫與一作
共君酌酒聽君吟

南城席上聞箏裏張子淵二首

春晴隨意出南城尊酒花前得共傾留客強陪今日醉

聽歌不似少年情

海上張家玉雪郎錦箏銀甲醉高堂別來萬里風波外
燈下聞箏忽斷腸

張員外光弼先生奉楊公之命函香浦陀洛伽山

瑞相示現使節今還輒成長律四章少寓餞忱

錄二

江左長城有鐵星赤心憂國禱滄溟經翻海藏函猶溼
兵洗天河刃不腥屢出賜金分將帥終圖全璧奉朝廷

幕中司馬才無敵執筆磨崖早勒銘

北史楊津鎮定州
威望赫然軍中謠

曰不怕利槩堅城
但怕楊公鐵星

天上張公玉雪妍
競傳官府有神仙
功名早建平南策
詩句今隨過海船
夜汲澄潭餅貯月
曉登磐石珮凌煙

知君喜得禎祥兆
一目高懸古樹邊

宋史彌遠禱海上見一目挂樹邊後

果拜相

元詩選初集卷四十一

欽定四庫全書

元詩選初集卷四十二

庶吉士顧嗣立編

鹿皮子陳樵

樵字居采婺州東陽人負經濟才介特自守隱
居固谷間衣鹿皮自號鹿皮子以當事者薦徵
之不起專意著述尤長於說經與同郡黃晉卿
輩友善嘗貽書宋景濂諄諄以文章相勉勵云
所著曰鹿皮子集好為古賦組織綽麗有魏晉

人遺風其詩于題咏為多屬對精巧時有奇氣
如山遮春欲歸時路鴈入鳬飛不盡天僧爨屋
頭猿挂樹鳥銜窗外雨生魚春在地中長不死
月行天盡又飛來臺虛人在空中立雲靜天從
水面浮詩無獺髓痕猶在夢有鸞膠斷若何野
鹿避人懸樹宿溪魚乘水上山來天出異香薰
寶樹日將五色染游絲絮輕便欲排雲衣花好
多應換骨來即此數語可以步武西崑諸作

出塞曲

為戍潼關
李總管賦

屬鏐夜號光屬地將軍一出機槍死行塵不動人歸市
帶甲如雲自天至取君甲兵為君洗分明裏有銀河水
手中遺下泥一丸不封函谷封泰山

夜闌曲

碧宇星回夜漫漫靈蕪煙煖重薰薦冷翠香銷青桂枝
冰荷葢光光遶帷花樓豔舞金菱蕤吳羹蜀酒精瓊糜
酒闌半解龍綃衣春朝曲渚聞鷓鴣雞

海人謠

海南蠻奴髮垂耳朝朝采寶丹涯裏夜光盈尺出飛魚
柏葉收珠寒蕊蕊幽箔連錢生綠花切玉蠻刀如切水
九譯來朝萬里天北風不動琅玕死

東飛伯勞西飛燕題飛花亭

東飛伯勞西飛燕花光絮影從風轉蜂黃蝶粉照靈葩
不散明珠祗散花霑衣墮袂花如雨羽人化蝶隨花去
與人下顧笑春紅春閨一昔生秋容

一作吳蕉未省生秋風

骨齊

熊耳君知否花豔春暉不經久羽衣一拂千萬春春花
墮蕊齊崑崙

中秋月

銀漢西流鳥接翼回首人間化為碧瑤臺銀闕相扶疎
三郎錯路歸鳧鳬霓裳月裏親偷得却怪李謩偷壓笛
寒食詞

縣上火攻山鬼哭霜華夜入桃花粥重湖煙柳高插天
猶是咸淳賜火煙

虞美人草詞

美人不願顏如花願為霜草逢春華漢壁楚歌連夜起
騅不逝兮奈爾何鴻門劒戟帳下舞美人忍淚聽楚歌
楚歌入漢美人死不見宮中有人窺

七夕宮詞

內人拜月金鋪戶鳳宿梧枝秋葉下露華入袂玉階寒
織署錦工催祭杼月下金鈿照骨明同心絲繪紅生縷
素瓜碧寶上華樓夜闌颺馭下銀州

清隱亭

白日照陽春九陌揚遠塵往來酣蟻戰誰是投閒人
生苟知足政復貴隱淪萬事等大夢汨沒徒艱辛所以
賢達士不肯勞其神結亭林泉間歸來養清真窻虛野
鳥狎樹密山猿馴草色上階秀花枝倚檻新俛仰有佳
趣尊酒時相親終然遠塵俗不媿無裒民

雨香亭

花香不因雨雨過花更香氛氲入几席馥郁侵衣裳恍

疑燕沈水輕煙逐風揚此時鼻觀通百慮都已忘願攜
白玉盤掇英挹天漿灌沐紫金丹夕酉滋芬芳服食養
精魄一息三十霜絕勝仙掌露灝氣凝秋涼

悅心亭

清晨攬衣起感物暢我情春風從何來草木忽已榮深
池躍游鯈喬木遷鳴鶯俛仰極萬類氣機足生生哲人
貴冥會悠然竟何營此樂難具述酒至且復傾

送李仲積北上

圖名當入朝圖利當入市丘壑多賤貧胡為久留此入
市不圖利入朝不圖名不如丘壑間逍遙抗高情白日
從東來忽焉向西沒急景易蹉跎紅顏坐消歇鼎鼎百
年內已過四十春借問百年老能有幾何人縱使創還
丹可以長不老志士惜分陰立身亦不早回首望堂上
慈親雙鬢皤得祿奉榮養其如遲莫何絕裾固無取負
米良足美違離膝下去豈比蕩遊子戢戢黃金臺鳳詔
求賢材君行會有遇名成早歸來

送吉夫北上

之子冰雪姿冥心學仙真官卑且勿念況復憂其貧
邇來太白山山勢凌秋旻雲盡月照夜花開鳥鳴晨閒居
少公事猿鶴為比鄰採芝過林麓釣魚遊水濱七年不
得調幽興如逸民通塞任物理聊用安此身憶昔始相
識交情日相親問君鍊藥說祕之不肯陳金液且莫採
何以製水銀豈伊蓬萊中無分追後塵君今別我去九
關朝帝宸功名信可就慎勿煩精神闔風青峩峩海波

白粼粼他年重會面笑盼桃花春

雙柏

題畫

亭亭山上柏柯榦如青銅蒼古拔俗姿肯作兒女容風
霜日搖落萬木為之空爾獨不見摧屹立如老翁乃知
歸根妙生意恒內融願乘雷雨興化作雙飛龍

瓊林臺

上清瓊林臺似有千仞崇琪樹交柯生瑤草亦成叢幻
境類玄圃凝輝接琳宮天花或時墮縈紆颺迴風仙人

薛玄卿手持玉芙蓉傲睨八極表洞見萬象空飛書約
王子弭節延赤松步虛朗歌咏流響入雲中

宣和滕奉使茂實

滕人

鴨綠少年驕不舞大梁花石春無主天與遼人十四州
四海九州非漢土漢使相看墮節毛烏鳥黑頭羝不乳
舊時別贈楊柳枝插向雲中今十圍

和楊廉夫買妾歌

劉郎持玉笛再入天台山天台女兒不相見採藥直入

桃花源劉郎吹笛花能言雲離雨別三千年青廬橫波
髮鮮碧藍紅染作天桃色劉郎今姓楊相逢便相識金
條脫龍縞衣颺車木鳳凰飛下鐵山西倩桃拂面丹如
雨紅蝶黃鸝解歌舞桃源無路入人間一身金翠來何
許玉山子莫將迎方平會麻姑參語無蔡經飛仙不入
風沙地無端夜過崑山市三滌腸三洗髓絳雪玄霜玉
池水

代玉山子答

建昌老父吹羌管背花吹盡風花片雪中花老花未知
我起開簾納江燕夏姬出境春爭妍房老不離金谷園
花奴鼓急人人顧研光帽滑花難住

待月壇

為胡伯玉賦

憶昔待月錢唐秋眼寒桂樹枝相樛桂枝半蠹花不實
折之不得令人愁帝鄉幽燕邈吳越還向山中弄明月
聞道君家待月壇壇空風露何漫漫便欲因之遡寥廓
倒騎玉蟾飛廣寒廣寒宮殿殊清絕素娥嬋娟皎如雪

笑指桂樹對我言
留取高枝待君折
待君折須幾時明
年八月會相見
付與天香第一枝

題海棠

東風吹墮綳雲影
別院春遲宮漏永
繡帷寶帶綰流蘇
夢入瑤臺呼不醒
熒熒銀燭花蕊多
城頭烏噉奈曉何

石溪歌

為石漢和尚作

石溪一滴水
本自明河來
明河倒瀉箕尾溼
千里萬里喧風雷
小龍挾向雲間過
水滑瓢歌誤傾墮
蒼崖一息

裂清泉似是巨靈新擘破南州衲子天下奇夜撐鐵笛
欲渡之珠船照耀明月冷赤手拾得珊瑚枝又復揚舠
向東去直到衆流歸一處東方火發海影紅金烏飛上
扶桑曙

胡伯玉隱趣園君子池

五月菡萏發紅妝明綠波君看池上水何似若邪多若
邪女兒歌豔歌輕舟短櫂相經過傾城顏色有人妒日
莫涼風知奈何

蘆鴻四咏飛鳴宿食

二錄

肅羽遵寒渚渡江蘆葉黃誰云南去遠不敢過衡陽
沙汀棲處穩夜漏有奴看月暗蘆花白一身秋夢寒

送李仲積北上

北上京華去名成幾日歸春風折楊柳離思兩依依

送孫仲明尉再到東陽省墓歸太原二首

遊子思親日九回首丘無計轉堪哀故人相見休相問
不為東陽酒好來

西風老淚斷人腸
滴死墳前草樹荒
明日還家重回首
白雲何處是東陽

石

拳石當軒玉色寒
雨苔蝕盡鷓鴣斑
也知好事無真見
不看真山看假山

山水

青山如髻樹如麻
茅屋青帘認酒家
侵曉一番風雨過
滿川流出碧桃花

送蒙古教授郭受益歸洛陽

足馬金華道西風過鴈初
尊羹千里地菰米九秋餘
齊語傳聲澀巴童問字疎
湯湯清洛水舊學復何如

白鸚鵡

開元白鸚鵡

一作雪衣女

長在玉墀邊宮樹棲應熟
胡書讀未

全音餘西域語夢入廣南天
莫把宮中事偷歸外國傳

銀谷澗山房

樓臺依水石石樹帶疎篁
洞口有靈藥水西無夕陽天

花空處沒春草定中長芳桂已飛盡有時聞妙香

春日

細雨花陰重輕煙草色勻驚禽長避客嬌燕却依人絃
管紅樓酒跼蹠紫陌塵東風競遊賞因想杏園春

雨二首

雲氣朝彌積濤聲晚更雄鼉生沈寗下人入漏天中稍
覺傷生意深愁誤化工羲和司叱馭為擁日車紅

楚澤連空闊吳天極杳冥水添今日白山沒向來青鷗

鷺乘原隰藜蒿翳戶庭出門知未可試學衛生經

送張仲舉歸晉陽舉進士二首

藉甚張公子詞華衆所推門閭千里望天地一編詩花
落山公宅雲寒杵臼祠看君歸晉日翻作別家時

挂帆謝公浦把酒闔閭城江柳不忍折春風當別行關
雲連楚暗隴月向吳生葉落長安道思君北問程

黃晉卿見過却歸烏傷

江雨間行人江干雨又新今朝下垂榻幾日望行塵冰

雪鷺遷樹江湖鴈得春非君被軒冕裹抱欲何伸

送烏經歷歸二十韻

大府羅賓彥修門得俊賢明時優外任密畫制中權
曉日卿雲麗高秋白月懸千尋看壁立百練識金堅
殷浩名無忝崔羣美可專緋袍臨僻壤華髮憶流年
山揖金華秀城當婺女躔民風仍皞皞王道故平平
玄暢塵囂外芙蓉爽氣邊
憲臺依翠柏幕府擁紅蓮
法謹持三尺書應受一編公
言歸可否德意賴承宣
歛郡推夷直河

陽贊巨川可能羞噲伍豈復媿盧前淵媚珠含彩林輝
玉吐煙豫籌纓婉婉歸思忽翩翩趨拜麒麟殿違離玳
瑁筵幾時嗟蜩屈後日看鷺遷空遺參軍紙曾辭太守
錢雙溪清若許明月送歸船

題建炎遺詔

解下塗金膝上衣

一作蛾眉
金縷衣

息息命將墨淋漓圖中吳

楚無端拆月裏山河一半虧銀漢經天都是淚杜鵑入
洛不如歸黃衣傳詔三軍泣不是班師詔岳飛

鹿皮子
律詩多

出韻者即吳才老通用之意已
為宋景濂洪武正韻發其端矣

蛺蝶圖

禁籞名園信所之
淡紅膩紫共春暉
人疑落葉有生色
我道飛花上故枝
掌上豔姬垂
東舞屋頭故吏竊香歸
花中只許秦宮活
未必莊生入夢思

北山別業三十八咏

錄十六首

太霞洞

冬春居此洞

石林深處飯胡麻
幾度登臨送日車

一作山中穴處還
春和洞下栽桃攬

華物雪到峰頭猶是雨雲生石上半成霞相看露下朝華

草不放春歸冷豔花

地冷花遲
元無影日

一作樹臨陰壑
傍晴崖不度花

魏紫

姚黃風埽盡人間蜂蝶到山家

一作莫夜相過玩清
月山前鄰笛兩三家

飛雨洞

盛夏居此洞流沫
成雨中有小泓

蜀天萬里入東州

一作天梯石
棧落東州

冷翠侵扉翠欲流朱鯉

有靈時出穴白狐生火幾經秋山中十暑寒猶在潭上

千年雨未收昨日西林晞白髮溼雲依舊滿貂裘

碧落洞

秋初入
居此洞

灝氣翻衣露滿裏人言天上我驚猜近從月裏種花去
遙見鼎湖飛葉來使我加餐有黃獨為人題榜是青苔
杖頭化作光明燭願逐東皇下九垓

巴雨洞

溼雲侵被

一作衣洞

細泔泔自曬蓑衣石上楓海月長來飛

雨下仙家半入漏天中石稜近水依崖長山梯著霜連
葉紅却笑當年補天手鍊成五色竟無功

梅墩石

篁竹蕭蕭暗一作水鳴朝暎奕奕耿殘星繇花無處分

南北明月何時厭死生石樹裏雲長自溼日華映雨半

邊晴霜晨露夕長來往幾度攜琴鼓再行

越觀

在巖頂

吳根越角兩茫茫石傘峰頭俛大荒鳥道北來通禹會
鴈程南不盡衡陽雲移暫覺天河沒月暗不知松影長
天姥若邪他日事明朝采蕺下山梁

陳氏山林春日雜興

賸水殘山瘴海濱一丘一壑可全真月華一作夜光雖死猶

隨我春色為塵亦污人石護生香成石乳花連別樹作

花身

新接梅

他年終擬忘名氏碣石桐江理釣綸

少霞洞山居

太霞洞口

一作裏

採金芝千歲山南

一作前

聽碧雞煮石鼎

中饒

一作燒

綠薤封書函外有丹泥度關僧寄娑羅樹入

市人傳木客詩又

一作却

抱瑤琴向陰洞青禽啄碎碧梧枝

圓谷澗

一作臺

雲在闌干葉在庭

一作囊

中無藥事

一作自

飛騰丹霄有

路星辰近

一作長河如帶東南拆又作銀河屬地西南溼

明月無根日夜生滿

東天香和夢冷半邨雨色傍林青仙人約我瓊樓上一作

瓊樓玉宇

丹霄裏

只恐月中秋更清

秦素壇

竹死煙寒樹不榮石壇千仞與雲平春來天上元無色

雨到人間方有聲夢入松風吹不斷詩如芳草翦還生

陶山北望飛霞散夜半有時孤鶴鳴

一作他年學製鄒生律盡種山樊與杜蘅

招隱巖一作山

何年積蓋與山齊
樹轉峰回草逕微
野火裂為方解石
秋風不到寄生枝
誰來樹下看雲坐
半入人間作燕飛
箬笠巖一作柏葉山前
今淨社不須更草北山移

紫薇巖在蘭池上

手種巖花對北峰
花間無葉紫茸茸
人行鳬鴈不到處
家在鸛花第幾重
綠水值陰還又碧
青春著樹却成紅
紫薇莫入絲綸閣
且伴山中白髮翁

石甌峰

柏葉山前鶯亂啼，小樓西望石離離。北峰雲出何曾斷。

一作甌中雲
起長如湮

東郡一作門外

山凡不解飛蘿薦，相扶根著樹。

蟾蜍不死肉成芝，黃梁夢短風塵暗。不是山人好食薇。

飛花亭

昨日朝華照夕曛，又看夕秀比朝菌。松高猿見古時月，
花晚鶯添幾日春。盛露囊中封臘藥，無塵東裏裏吳雲。
人間何用春長在，只愛飛紅日日新。

空翠堂

蕉葉莢葵照檻明
山光入室雨初晴
平分天上無邊色
送盡江南未了青
息石長年依砌活
茯苓無種入階生
亭西昨日林霏重
採藥歸來露滿庭

鹿皮子墓

土蝕苔

一作石
上藤

侵古瓦棺

一作
斑

化臺深鎖萬松關
坐看

天上樓成日吟到
人間詩盡年勾漏
無靈丹竈冷孟郊
未死白雲閒江南
春草年年綠又向
他生說鄭玄

鹿皮子北山詩咏多秀健之句如五雲洞云松花入
醺傳香碧貝葉分題寫硬黃溪亭云雲隨白鶴翔千
仞月與青猿共一枝翻經臺云枝重有時來白鳥雨
殘無處著晴虹東白草堂云卷簾帳下雲先去步月
庭前樹欲行望月臺云松高琥珀無苗出蟾老丹書
滿腹生銀谷澗空碧亭云水鳥臨池青入羽仙人唾
地碧如天少霞室云石壁水花泉湧出海棠春色鳥
銜來少霞澗云龍帶雨花臨硯滴僧添槲葉上秋衣
北峰云雲傍樓臺低地碧天將草樹染春青水亭云
曲水傍人流白羽嬌花無語答黃鸝清涼臺云好風
入夏傳芳信片雨隨龍度月明忘憂閣云天外唾如
雲樣碧江南春與草俱青南軒云人來此地見山碧
月未冷時如日紅雲山不礙樓云庭虛只放溪雲度
水淺不妨松影長蘭池云猿窺澗底風枝動鸞踏花
閒水影翻壺天云神遊八極皆吾土天入三山不滿
壺又有蘿衣洞醒酒石固谷澗野芳園山齋山園等

題共三十八咏其棲隱之地可以想見後以鹿皮子墓終之亦司空表聖王官谷生壙之意也

臨花亭五首

惡雨愁風易結闕
夜遊秉燭晝傳殮
香添荔子能消日
粥費桃花怕減春
綠暗有人來折柳
紅飛翦紙為招魂
竹間午夢時驚覺
滿眼卿雲覆錦茵

芳草生煙葯在房
鞵紅衣紫共芬芳
丘園風雨三家市
草木文章萬丈光
花正欲言還寂嘿
春無自性不堅良
晚來只有鵝紅在
莫放香絲取次黃

滿樹琉璃間碧瑤
當歸葉長映芭蕉
樹頭生雨時時溼
春色如花日日銷
杜宇有言終不踐
綠魚新種已生苗
今朝百舌聞鶯語
飛上梧桐特地嬌

松邊柳下日徘徊
鳥散飛紅墮酒杯
芍藥成叢當戶出
茯苓分種傍松栽
雲高卷雨從風去
花晚將春入夏來
亭下肉紅如斗大
耐看不似玉玫瑰

遠山過雨綠崔嵬
竹外青松竹下梅
滿樹丹青隨物換
平生富貴逐春來
歌珠一串鶯流出
花影數重風揭開

關右牛酥賤如土莫教紅紫落成堆

蠟屐亭

晉阮孚避
亂婺州

七賢老死獨南奔
東有江亭墮淚痕
角夏盡為新土宇
醉鄉不失舊乾坤
金貂曾入丹陽市
蠟屐應歸白下門
惆悵黃門墓前柏
不禁三度見風塵

上虞魏氏湖上精舍圖

湖上蘭舟水上亭
有時水漲與階平
亭前古柳經春弱
門外孤洲昨夜生
海氣遙連一作侵育王塢
蜃樓半入會

稽城山陰道士攜琴至寫盡風聲到水聲

霜巖石室二首

洞天無暑亦無寒
淑氣芳風不出山
埽葉僧歸雲未溼
賣花人去蝶先還
滿庭修竹下黃葉
千歲古松生綠煙
盡道雪中依裸壤
我疑夏室是冰天

滿林翠霧溼麻衣
山影遙侵白板扉
竹石無心吾所畏
煙霞有疾不須醫
夢騎鶴處天逾闊
歌過雲時花不飛
燕子歸來背人去
吾廬無地可棲遲

石樓草廬

一室寬於一畝宮
隔林竹樹影重重
青春著地十分綠
白日經天兩度紅
小草自憐無遠志
茯苓終不近孤松
未須西憶金華洞
只在周回百里中

空碧亭

晴光潭影共澄鮮
雨外林陰色更妍
碧海如杯誰縮地
青冥著水誤憂天
河垂澗底遙相屬
斗入人間却右旋
病叟年來倦登陟
朝朝玩水夜聽泉

山房

冷雲堆裏散人家。鹿幘羊裘不衣麻。門外樹身無歲月，
山中人語帶煙霞。雲侵壞衲長生菌，風斷游絲半度花。
采葢林深人不見，連筒引水自煎茶。

飛觀

日高空翠拂簾旌。茅閣飛飛照日明。銀色榜題章草字，
烏絲闌寫越花名。何須舉翮乘風去，曾入浮宮看月生。
却笑羣仙餘習在，隨身宮殿逐人行。

寶掌泉

屋上無端雨亂飄
雨留石罅碧寥寥
浮光出穴藏丹淺
浣水為花到地消
石髮年深長滿洞
玉魚春冷未生苗
泉中自是蛟龍窟
頃刻陰雲滿樹腰

春日閨思

白玉堂前雙燕飛
堂中思婦怨殘暉
臂環寄遠青蕪合
瓊宇題乾白鴈歸
醉倚合昏驚葉暗
愁尋豆蔻妒花肥
窗間昨日同心錦
染罷香絲不上機

跳銀溪

枕石聽泉伏草萊
跳銀溪上日裴裛
山間遠樹迎人出
日轉晴虹渡水來
雲氣長連西澗石
春寒猶在北枝梅
谷亭幾載秋無黍
沙上菰蒲暖更栽

分題翠光亭送李仲常江陰知事

亭前練水細如縈
亭上君山玉作屏
林斷纔通吳月白
鴈飛不盡楚天青
莓苔著雨長黏石
翡翠迎風欲墮翎
怪得步兵迷望眼
詩成正值酒初醒

詩林亭

少日論文氣似霓
看花覓句到花飛
吟成思入月中去
語冷心從雨外歸
林下樹寒和石瘦
雲邊螢溼渡花遲
眼中有句無人道
投老拋書衣鹿皮

玉雪亭六首

梨雲柳絮共微茫
春入園林一色芳
枸杞通靈空吠月
芙蓉到死不禁霜
夢遊蓬島瑤臺曙
歌落吳雲玉樹長
亦擬廣寒親學舞
朝來新製白霓裳

冰夷遊遍列仙家片片臨風散
六花陰壑有光迷白月
亂山無處覓青霞臺高漸見石稜長
枝重不禁梅影斜
聞說銀河都翦碎津頭幾欲問星槎

凍雲巖壑曉瞳矐目極齊州望欲空
落月回光窺上界
嬌花無信誤東風曲吹鐵笛驚雲散
槎向銀河與海通
野客燒丹深洞裏自調火候似春融

銀漢傾翻貫月查驚鴻無處認江沙
水晶簾密秋光冷
華蓋峰高天影斜飛瀑半凝蒼玉佩
薰風不度碧桃花

山前山後多鄰曲盡作江南富貴家

俗塵無路到巖扃瓊作池臺玉作亭海月寒通千頃白
楚山瘦減八分青回屏紋細裁龜甲野褐年深補鶴翎
應有才華奪天巧天葩飛墮滿中庭

羽仙飛步駕青鸞仙袂臨風響佩環琪樹移根來月裏
瓊花無夢落人間春回壘首梅先覺舟入山陰客未還
我亦玉堂揮翰手他年鵷鷺筮朝班

三泉

泉眼離離傍石稜，奔流脈脈到軒楹。
詩成石面花無數，夢冷池頭草不生。
江夏茶經有遺譜，南碕水樂變新聲。
林居漸覺機心斷，渴鹿逢人自不驚。

少微巖

石醜松寒槲葉

一作夏

乾振衣，又在碧霞邊。南州處士星

猶近今歲中秋月未圓

十六日望

雲葉長黏巖上石，雨苔不

滿洞中天麝香眠處休驚起，綠桂初紅果欲然。

長安有狹斜行

長安有狹斜方駕秦中客云是牛丞相來自薄家宅薄
家萬戶侯朱門映椒壁長楸車馬來賓客御瑤席金屋
貯尹邢阿嬌淚沾臆燕燕慵來妝繡華照春色轉蕙光
風翻趙帶徘徊月到班姬牀班姬輟芳翰紈扇從風揚
明妃鬪百草玉環御雲裝向來溫柔地盡入白雲鄉何
以慰王孫琵琶隨驕驕何以闕燕燕罷舞歌慨慷何以
奉明主綠珠奏清商嫫母挾無鹽搔頭愛宮妝

送厲生之天台

劉郎洞前藥草肥年年送春春不歸
劉郎採藥路不迷路迷却是還家時
人間藥盡採者稀醫師採藥歸未遲
終南捷徑莫西去正在劉郎路迷處

竹枝詞二首

望夫石上望夫時杜宇朝朝勸妾歸
未必望夫身化石且向征夫屋上嘯

僻亭女兒坐可憐今年同上採蓮船
妾心恰是荷心苦只食么荷不食蓮

謝闕

宗可

宗可字

闕

金陵人有咏物詩百篇傳於世汪

澤民題其卷以為綺靡而不傷於華平淡而不
流於俗大抵元人咏物頗尚纖巧而宗可尤以
見長今擇其雅練者錄之其他句法多可存者
如詠紙衾云松牀夜暖雲生席蕙帳香融雪滿
身梅夢云暖入羅浮春困早香迷姑射曉醒遲
筆陣云怒卷龍蛇雲霧泣長驅風雨鬼神驚鶯

梭云柳隄暗卷絲千尺花隄橫拋錦萬機鷺羽
扇云暑退沙頭千點雪涼生頂上幾絲風螳螂
簪云鬢雪冷侵霜斧落髮雲寒壓翠裳空螺殼
酒杯云尊中綠照珠光潤掌上春擎海氣多網
巾云篩影細分雲縷滑棋文斜界雪絲乾琉璃
簾云淨練懸風晴未落明河接地曉難收水燈
云珠浮赤水光猶溼火浴丹池夜未乾霜花云
有豔淡妝宮瓦曉無香寒壓板橋秋紙鷺云半

紙飛騰元在已一絲高下豈隨人蟠梅云風霜
氣勢從千折鐵石心腸亦九迴硯冰云一泓曉
色玄霜重半夜天風黑水乾塵世云微步緩隨
羅襪起清歌飛繞畫梁空醒酒石云蒼骨冷侵
酣枕夢苔痕清逼醉鄉春梅杖云江路策雲香
在手溪橋挑月影隨人雪煎茶云月團影落銀
河水雲脚香融玉樹春問梅云鐘殘角斷愁多
少月落參橫夢有無尊線云冰穀冷纏青縷滑

翠鈿細綴玉絲香類皆婉秀有思致也

睡燕

補巢銜罷

一作得

落花泥困頓

一作倚

東風倦翼

一作翅

低金

屋畫長

一作間

隨蝶化雕梁

一作玉堂

春盡

一作靜

怕鶯唬魂飛

漢殿人應老

一作遠

夢入烏衣路轉

一作欲

迷却怪

一作被

卷

簾人喚醒小橋溪巷

一作流水

夕陽西

紙帳

清懸四壁剡溪霜高臥梅花月半牀
繭甕有天春不老

瑤臺無夜雪生香覺來虛白神光發睡去清閒好夢長
一枕總無塵土氣何妨留我白雲鄉

曉色

遠似煙霏近又空非明非夜兩朦朧一天清露洗難退
幾樹暗雲遮不窮畫_{斷一作}角樓臺濃淡裏殘燈院落有
無中蒼茫半逐雞聲散又被朝陽染作紅

茶筵

此君一節瑩無瑕夜聽松聲漱玉華萬縷引風歸蟹眼

半瓶飛雪起龍牙香凝翠髮雲生脚
涇滿蒼髯浪卷花到手纖毫皆盡力
多因不負玉川家

賣花聲

春光叫遍費千金紫韻紅腔細細吟
幾處又一作偶驚遊

冶夢誰家不動惜芳心暗一作響穿紅霧樓臺曉一作遠清

逐香風巷陌深妝鏡美人聽未了
繡簾低揭畫簷陰

詩瓢

雨蔓霜藤一作條老翠壺吟邊不是酒
葫蘆剖開架上輪

困玉著盡胸中錯落珠滿貯苦心留宇宙深藏清氣付
江湖誰家半腹能千首為問山人果在無

鴈賓

地北天南萬里身驚寒昨夜過邊塵暫隨沙漠秋來夢
留得湘江社後春水宿雲飛同是客風嘹月唳自相親
荒汀斷渚年年路應認蘆花作主人

紅梅

梨雲無夢倚黃昏薄倩朱鉛蝕淚痕宿酒破寒薰玉骨

仙丹偷暖返冰魂，茜裊影露羅衣。卷霞佩，香封縞被，溫
回首孤山斜照外，尋真一作春誤入杏花邨。

鴈字

蘆花月底寄秋情，陣影南飛勢一作寫不停。一畫寫一作帶畫

開湘水碧半行，草破楚天青。雲牋冷，印蟲書迹，煙墨濃。
模鳥篆形題盡子卿一作故鄉心事苦，斷文無數落寒汀。

龍杖

鱗甲光搖玉一枝，幽宮躍出袖中持。多因掌握提携晚，

休恨飛騰變化遲
緩策不愁山雨溼
醉橫長有野雲隨
會看挂壁風雷起
莫待詩翁過葛陂

螢燈

微熒閃閃拂晴波
幾度黃昏誤舞蛾
銀粟無煙棲碧蘚
玉蟲留影綴青莎
秋空雨歇寒光墮
晚逕風閒冷燼多
欲喚紗囊車武子
為渠還賦短檠歌

綠陰

萬樹東風湧翠瀾
遮藏芳恨料猶難
入簾蒼靄暮春晚

滿地碧雲清畫寒柳暗池臺煙乍溼槐深門巷雨初乾
階前花落無人到又染苔痕上石闌

鴈陣

渡江秋影又南征折葦銜枚夜不驚冷聚圓沙盤地軸
曉浮寒水落天衡風馳截破湘煙闊雲擁斜衝塞月明
洲渚網羅應有伏橫空千里不留行

鼠鬚筆

夜逐虛星上月宮奮髯奪得管城公橐中不攪吟窻夢

指下先爭翰苑功
莫笑硯池濡醉墨
絕勝倉庫飽陳紅
平生齧盡詩書字
散作龍蛇落紙中

龍涎香

瀛島蟠龍玉吐馨
輕氛飛遶博山青
暖浮蛟窟潮聲怒
清徹驪宮蟄睡醒
碧腦盈箱收海氣
紅薇滴露洗雲腥
雨窗篝火濃薰被
夢駕蒼鱗上帝庭

蘆花被

白似楊花煖似烘
纖塵難到黑甜中
軟鋪香絮清無比

醉壓晴霜夜不融一枕和秋眠落月五更飛夢逐西風
誰憐宿鴈江汀冷贏得相思舊恨空

蓮葉舟

穩擢紅衣泛渺茫風帆浪擻水雲鄉曉撐太華半峰月
晚載西湖十里香藕放雪絲應作纜荷欹翠柄若為檣
不須更捧金仙足太乙真人夢正涼

漁蓑

翠結香莎付釣舟一竿風雨不須愁苔磯夜泊披寒去

葦岸昏歸帶溼收月冷籠衣眠舵尾天晴隨網曬船頭
羊裘莫笑狂奴錯也著煙波萬頃秋

走馬燈

颺輪擁騎駕炎精飛遶人間不夜城風鬣追星低弄影
霜蹕逐電去無聲秦軍夜潰咸陽火吳炬宵馳赤壁兵

更憶彫鞍年少夢

一作客

章臺踏碎月華明

蓮燈

萬點芙蓉午夜芳醉看疑是水雲鄉蘭缸照破西湖夢

火樹燒殘太液香
焰暖應愁擎夜雨
燼寒不為倒秋霜
元宵庭院東風曉
零落紅衣繞畫梁

柳眼

媚嫵窺春淺
碧浮欲開還閉半
顰羞露垂煙縷
秋波溜雨歇風條
曉淚收上苑
因酣興廢夢
灞橋看盡古今愁
五株彭澤回青
否應是生花雪滿頭

花霧

倦紫酣紅總未醒
暗薰芳淚滴無聲
羅幃隱繡迷春色

綺縠籠香護曉晴薄暝枝頭留睡蝶輕陰樹底咽啼鶯
東風卷到闌干曲半溼游絲舞不成

茶煙

玉川鑪畔影沈沈淡碧縈空杳隔林蚓竅聲微松火暗
鳳團香暖竹窻陰詩成禪榻風初起夢破僧房雪未深
老鶴歸遲無俗侶白雲一縷在遙岑

游絲

搖曳春光百尺輕煙綃舞斷任縱橫暗紫芳恨應無力

亂綰花愁似有情一縷綠楊風正軟半痕紅杏雨初晴
莫教飛到天機上恐一作空誤龍梭織不成

海蟄

層濤擁沫綴蝦行水母含秋孕地靈海氣凍凝紅玉脆
天風寒結紫雲腥霞衣褪色冰涎滑瑤縷烹香酒力醒
應是楚宮萍實老誤隨潮信落滄溟

醉鄉

曾笑三閭不解遊移家欲向麴城頭人酣方外鴻荒夢

誰識城中富貴愁
夜月放船浮酒海
春風扶杖到糟丘
相逢還似無何有
喚起東臯為贈侯

仙槎

曾作河源萬里舟
塵根已斷臥蛟虬
無心下土承煙雨
有路層霄犯斗牛
破浪遠衝銀漢曉
凌風徑渡碧天秋
歸來帶得支機石
誰識人間博望侯

天燈

龍逐炎精下紫宮
夜深不肯落雲中
光分霄漢三更黑

影亂星辰萬點紅
玉柱倚天擎火齊
金繩繫日挂瑤空
照開仙闕光明路
絳節霓旌穩駕風

無絃琴

獨繭長纒底用抽蛇紋空鎖鳳枝秋落星留

一作有暈繩

光斷凍瀑無聲練影收別鶴那聞風外泣孤鸞不向月
中愁多情只有柴桑老寂寂高山

一作山高水自流

松枝火

鮮骨誰教劫火侵欲將春意破窮陰鱗鬣光動紅雲起

膏液香融紫霧深
餘燼尚留霜後節
死灰難滅歲寒心
有時焰起隨風轉
猶是蒼龍澗底吟

藕花風

舞落

一作
罷

紅衣起未休
水雲鄉裏正

一作
冷

颼颼五更清

逼銀塘露

一作
曉

六月涼生玉井秋
颼浪低翻霞影亂
凌

波輕弄

一作
漾

錦香浮莫教吹醒鴛鴦夢
好送真人一葉

舟

水中梅影

澄澄寒碧映冰條雲母屏開見阿嬌春色一枝流不去
雪痕千點浸難消臨風倚檻雲鬟溼帶月凌波玉佩瑤
最是黃昏堪畫處橫斜清淺傍溪橋

半日閒

閒處光陰未有涯偶然一晌到山家坐看雲起晝停午
靜聽流泉日未斜槐影正圓初破睡竹陰微轉罷分茶
也勝忙裏風波客十二時中老鬢華

雙陸

彩散清響押盤飛曾記唐宮為賜緋影入空梁殘月在
聲隨征馬落星稀重門據險應輸擲數點爭雄莫露機
惟恨懷英誇敵手御前奪取翠裘歸

水中月

晴波浸月月波浮玉兔涼生萬頃流丹桂影沈江浦夜
白蓮光浴海天秋鮫人泣罷珠猶溼龍女妝殘鏡未收
應是廣寒眠不得水晶宮裏夜深遊

梅魂

枝南枝北路迢迢飛入孤山夜寂寥水月浮香應自返
溪風弄影為誰招縞衣夢裏和愁斷玉笛聲中逐恨消
似欠靈均歌楚些逋仙墳冷草蕭蕭

龍形松

天矯擎雲海上來蜿蜒蛻骨老莓苔紫髯夜溼千山雨
鐵甲春生萬壑雷影動欲翻平陸起聲號如卷怒潮回
蜨枝冷挂巖前月猶似擎珠照九垓

水紋


新綠粼粼漾淺漪織成春色上苔衣一池碧暈雨初落
千疊翠鱗風更微淨穀光搖湘女鏡輕羅影動水仙機
何如袖取并刀去剪取吳淞半幅歸

竹夫人

胸次玲瓏粉黛羞宵征何必抱衾稠應無雲雨三更夢
自有冰霜六月秋盡節每曾陳諷刺虛心那解老溫柔
專房不怕蛾眉妒只恐西風動別愁

鴛鴦梅

兩兩翹春簇錦機
文衾夢覺月分輝
枝頭交頸棲香暖
花底同心結子肥
金殿鎖煙妝粉額
玉堂環水浴紅衣
有情一種隨流去
莫被風飄各自飛



元詩選初集卷四十二